

Odil Yoqubov (1926-2009)



Odil Yoqubov (1926-2009)



Odil Yoqubov (1926.20.10, hozirgi Janubiy Qozog'iston viloyati Qarnoq qishlog'i – 2009, Toshkent) — O'zbekiston xalq yozuvchisi (1985). 2-jahon urushi qatnashchisi. ToshDU filologiya fakultetini tugatgan (1956).

O'zbekiston Yozuvchilar uyushmasida adabiy maslahatchi (1955—59), «Literaturnaya gazeta»ning O'zbekistondagi maxsus muxbiri (1959—63; 1967—70), «O'zbekfilm» kinostudiysi va O'zbekiston davlat kinematografiya qo'mitasida bosh muharrir (1963—67), G'afur Gulom nomidagi Adabiyot va san'at nashriyotida bosh muharrir o'rinnbosari (1970—82), «O'zbekiston adabiyoti va san'ati» gazetasi bosh muxarirri (1982—87), O'zbekiston Yozuvchilar uyushmasi boshqaruvining birinchi kotibi (1987—91), O'zbekiston Respublikasi Vazirlar Mahkamasi huzuridagi Atamashunoslik qo'mitasi raisi (1991 yildan) va Markaziy Osiyo xalklari madaniyati Assambleyasining birinchi vitse-prezidenti (1995 yildan) bo'lib ishlagan.

Dastlabki asari — «Tengdoshlar» qissasi 1951 yilda e'lon qilingan. «Dastlabki kadam» (1953), «Ikki muhabbat» (1955) hikoyalar to'plami, «Tilla uzuk» (1961) qissa va hikoyalar to'plamida muhabbatni insonga xos ulug', muqaddas xislat sifatida tasvirlaydi. «Muqaddas» qissasida (1960) Odil Yoqubovning chinakam yozuvchiga xos uslubi va yo'li namoyon bo'ldi. Mazkur asarda xudbinlik yo'liga tusha boshlagan yigitning to'g'ri yo'lga qaytishi masalasi qalamga olingan. «Er boshiga ish tushsa...» romani (1966) 2-jahon urushi davridagi front orqasidagi hayot, mehnat qahramonliklari, xalqimizning vatanparvarligi va mardligi haqida. «Bir feleton qissasi» (1961), «Qanot juft bo'ladi», «Matluba» (1970) qissalari va ko'pgina hikoyalarida yoshlarning

turmushda yuz bergan ziddiyatlarga qarshi mardonavor kurashi, muhabbatni tasvirlangan.

«Ulug'bek xazinasi» romanı (1973) olim va hukmdor Ulug'bek davridagi ijtimoiy munosabatlar, olis o'tmishimizdagi nur va zulmat o'rtaqidagi kurash haqidagi asardir. Romanda ayanchli takdirlar, fojialar ko'p, ammo optimistik ruh — inson tafakkuri va ezgulikning tantanasiga ishonch bor.

«Ko'hna dunyo» (1982) romanida o'rta asrda yashab jahon fani taraqqiyotiga ulkan hissa qo'shgan olimlar Ibn Sino va Beruniyning fojiali taqdiri qalamga olingan. «Diyonat» (1977), «Oq qushlar, oppoq qushlar» (1988), «Adolat manzili» (1998) romanlarida o'zbek xalqining 20-asrning 60—70-yillaridagi hayoti va kurashi manzaralari haqqoniy tasvirlangan. Garchi bu asarlarning asosiy qahramonlari turli sohalarning vakillari, xarakterlari ham turlicha bo'lsa-da, taqdirlari, maqsad va intilishlari bilan bir-birlariga o'xshaydilar. Ular nophob tuzumda yashab ko'p nohaqliklarni, fojialarni boshdan kechirgan, ammo tinmay mehnat qilgan va kurashgan, milliy mustaqillik poydevorini qurban, mustahkam irodali, mard va oljanob insonlardir. Odil Yoqubov mazkur romanlari bilan o'zbek nasridagi ijtimoiy ruh, keskin konflikt, xarakterlar, psixologizmni sezilarli darajada kuchaytirdi, uni yangi xarakterlar, yangi badiiy xulosalar bilan boyitdi.

Odil Yoqubov «Chin muhabbat» (1955), «Aytsam tilim, aytmasam dilim kuyadi», «Yurak yonmog'i kerak» (1958), «Olma gullaganda» (1961), «Muzaffar Temur» (1996), «Bir koshona sirlari» (2000) kabi pesalar, «Dilbarim», «Bahor yomg'irlari» kinostsenariylari (1971) muallifi.

Odil Yoqubov mohir tarjimon, munaqqid, publisist. Uning Abdulla Qodiriy, G'afur G'ulom, Oybek, Abdulla Qahhor, Hamid Olimjon, Abdulla Oripov va boshqalar ijodiga bag'ishlangan adabiy portret va maqolalari bor. Asarlari chet tillarga, shuningdek, qardosh turkiy xalqlar tillariga tarjima qilingan. Odil Yoqubov ijodi haqida adabiyotshunoslar Matyoqub Qo'shjonov, Ozod Sharafiddinov, Leonid Terakoyan, Umarali Normashov, Norboy Xudoyberganov, Botir Norboev va boshqalar ilmiy tadqiqot ishlari qilishgan.

Hamza nomidagi O'zbekiston Davlat mukofoti laureati (1977), «Do'stlik» (1994), «El-yurt hurmati» (1998) ordenlari bilan mukofotlangan.

2023-09-13 16:44:42